

Daktara belaukont

Ēlgs, erdvos kaliduoŗis poliklinikas apatēnemē aukštē. Pasēinēs sostatītē soulā lēguonams atsēsiestē.

Prīšās daktara doris sied trīs muotrēškas. Apvali senotē, gerā ēmētosi, ēš veida matītē, ka jaunīstie poiki bovosi. Ontruoji padžiūvusi, aukšta, joudās aulēnokās apsēavusi, aple 40 metu muotrēška. Tretiuoji dar jaunutelē, bet auksa žēids ont dešinies ronkas pērsto liūdēi izēngos ē muoterīstēs stuona.

Kēik tolielīau siediejē do vēdotēnē omžiaus vīrokā. Vēina nuosēs pakumpusi, ontra boka. Dar vēins senielis, nedroušē žvalgīdamuos ē šalis, siediejē pri pat daktara doru.

Muotrēškas po bēški rokavuos.

– Aš pērma karta pri daktara, vo jau septinta bēngo, – prabēla senuoji.

– Vo kas notēka? A pas vēdaus lēgū daktara eisi? – paklausē vēdotēniuoji.

– Je, je. Sosiedē Nastē sakē, ka pri kēta nēk. Ons dēdēlē gers daktars esos. Gerā aple šērdis išmana. Vo mon kēts nieks nier kāp šērdēs.

– Noj, noj. Dabā vēsē tik so šērdims goudas, – ēsēterpē jaunesniuoji.

– Aš sava mama ožpērnā palaiduojau so šērdē, – sosējaudēnosi ēštarē vēdotēniuoji.

Vīrā prunkštēliejē, vēns ē saka:

– Nebovau gērdiejēs, ka laiduojint žmuogou šērdi ēšimtom.

– Tēkrā dēdēlē gers daktars, maluonos, linksmos, ruodlīvs. Aš jau ontra karta pas anou eito so skrondio, – čiolbiejē aulēnokou savininkē.

– Je skronde netorietumi, nē jiestē nerēktom, – atsēlēipē bokanuosis.

Sijuonoutuosēs sosēsžvalgē, bet nekrēpē diemesē.

Kaliduoŗiou ēš vēina gala ē kēta vākščiujē baltās kalatās muotrēškas. Vēina prakaušiejē gelžēniems kolnims.

– Žēimēškā segta, – ēškuošē bokanuosis.

Vīrā garsē nosēžvēngē.

Seselē, pravierusi doris, pakvēitē senuoli pas daktara. Netrokos ana pajiemusi senieli ož ronkas ē maluonē šnekindama novedē laiptās ē vēršo.

Pakvēitē ē senotē. Ši neožēlga išejē puopierelēs nešēna.

– A jau gavā repcikūs? – paklausē jaunesniuojē.

– Ne, ne vakalē, rēk neštē krauji, šlapēma ē šērdēis radiograma pasēdarītē.

Vīrā viel pagīviejē:

– Ka anās metās dērbau ont laivo, liuobam doutē radiogramas ē kronta kāp sekas žvejuotē.

– No nepasakē muotrēškelē kardiograma. Ēš kuo ēr joukaties, – pīktēliejē lēisuoja.

Sogrīža senotē so kardiograma. Kaimīnē ragēn, ka eito pas daktara be eilies, nes jau bova prisirinkēs būrelis lēguonu.

– Nier striuoka. Žēnts parveš so mašinelē. Marti ē darba nebeit, sied nomēi ont biuletenē.

– Je ēlgā siedies – sotrins tou puopiereli, – posiau balso sošnēbždiejē vīrā.

Po kēik laika ēš daktara išejē „muotrēška so skrandio“.

– No tad biego, gal dar sospieso ont autuobusa.

– Ont autuobusa nelēpk, sošalsi ē nokrisi, – viel lepteliejē bokanuosis.

– Kuo če kabiniejis pri žuodiu! – pēktā sošokosi nubiega laiptās ē vēršo.